

Segun comunicado di Evelyn Wever-Croes (MEP)


Urirama ta un acto criminal contra nos pueblo y contra nos naturalesa Partido MEP lo tene tur hende responsabel pa e dañonan causa

ORANJESTAD -- Cu un disgusto grandi mi a tuma nota di e hecho cu e compania di sr. Henk Hutting Nu-Capital a haya e permiso di gobierno pa continua cu e proyecto di Urirama, y cu e compania mesora a core firma cu WEB pa asina WEB cumpra coriente for di nan. E firmamento aki ta wordo cuestiona, pasobra Gobierno no tabata tin e decencia di informa pueblo prome. Y ta logico, pasobra Mike Eman mester a cumpli cu compromiso di campaña, y no tabata kier pa ningun hende strob'e. E proyecto di Urirama ta conta cu hopi resistencia den comunidad. Na prome luga, pasobra cada un di e 10 molinanan, cu ta mas halto cu Hooiberg, ta destrui un area grandi di nos naturalesa, y cu ta sumamente importante pa nos turismo. Nos economia actualmente ta draai solamente riba turismo, y turismo no ta bayendo mes bon mas. Pa hustamente awor, cu nos ta memey di e pio crisis financiero di nos pais, bin cu un proyecto cu ta destrui nos turismo ta un acto descabeya. Tambe tin e aspecto di salud. Ningun hende por duna un garantia na habitantenan di e area cu e molinanan aki NO ta afecta nan salud. Estudianan ta muestra cu molinanan



por afecta salud di hende, y ta un abuso pa expone miles di persona na e riesgo aki, sin kier duna nan un garantia. Mirando cuanto gasto nos cuida di salud ta costando, bo lo puntra bo mes si berdad nos mester expone tanto hende na peliger pa nan salud. Aparte di esaki e proyecto aki ta nifica e fin di e pas y tranquilidad na e luga sagrado di Alto Vista. Bo lo puntra bo mes con un gobierno por hinca den su cabes pa destrui e pas y tranquilidad ey? Pa

destrui un di e poco luganan cu a keda ainda na Aruba pa hendenan bay medita of resa. E contesta te dia di awe ta keda desconoci, y por solamente specula dicon gobiernu di AVP kier caba cu esaki. Pero locual ta mas di condena ta cu e prijs halto cu henter e pueblo di Aruba ta bay paga pa esaki, lo NO reduci e gastonan di coriente. Cu e contract cu a wordo firma entre WEB y e compania di sr. Henk Hutting, ningun hende nan recibo di coriente lo baha den e siguiente 15 aña,



of mas. Pues e ora bo ta bolbe puntra bo mes, dicon mester a firma esaki?

Unico cos cu por sirbi di splicacion ta cu e proyecto aki di Urirama tabata un compromiso di campaña di AVP cu hendenan cu a hinca hopi placa aden, y awor mester bin "pay back time". Gobierno di AVP ta sintiendo cu su dianan ta conta awor cu Hulanda no ta sostene AVP mas, y p'esey awor, den ansha di morto mester core firma tur clase di proyecto pa esunnan cu a pone nan na mando. Y esaki lo no ta e ultimo.

Sinembargo, nos di MEP ta adverti gobernantenan, WEB y e companianan involvi, cu ora MEP ta den gobiernu, MEP lo tene nan tur responsabel pa daño ocasiona na nos ciudadanonan y na nos comunidad. E proyecto aki NO ta necesario den e crisis cu nos ta awor. Nos pueblo awor mester di alivio, mester di tranquilidad, y no mester di proyectonan monstruosos, cu ta trece riesgo pa salud di hende, cu ta bay trece e pueblo aki mas y mas den pobreza, y ta haci e MEGA DEBE di nos pais solamente mas grandi. □